

Ləkaləkatə nga Bulusə ka ənji Filipi

¹ Wiinə ləkaləkatə ca dzə daciai inə Bulusə da Timooti ənji slənə nga Yeesu *Aləmasiihu. Agi nəhəpaanə niinə tuunə ənji nga Əntanƒə asəkə vəranə nga Filipi, patə da matakəŋwanyinə goonə, da ənji tsakənə tuunə asəkə Ikəliisiya. Ma una, ləbə nuunə da Yeesu Aləmasiihu. *

² Wa Əntanƒə Dəsənaamə da Slandanə Yeesu Aləmasiihu a ɗa koonə pwapoonə, təya vii koonə ndzaanə jamə.

Də'wa nga Bulusə ka ənji Filipi

³ Agi kuyiriinə nə nyi tə Əntanƒəwaaki taa guci patə cii kya buurətə tuunə. ⁴ Taa guci patə cii kya ɗa də'wa ka putə goonə patə əsə, agi ɗanə nə nyi də moodasəka, ⁵ acii daga ka 'watəginə ka ca'ə ka əndzə'i nuunə agi tsakənə tə nyi, nya waaza Njunyi Habara. ⁶ Əntanƒə 'watəgi də njunyi slənətə a ədzəmuunə. Kə shii nyi ndilə ndilə, ka dzənə nə ci aakəŋwa də ɗa slənəkii see mada uugi, waatoo, saa'itə nə Yeesu Aləmasiihu a ənya.

⁷ Nğa'ə nya buurətə tuunə patə makə ətsa, acii mazaanəmuunə ka nyi. Amə patə, kə nee amə ka nğa'aanə nga Əntanƒə, nyi a furəshina, da saa'itə wabi nyi agyanə Njunyi Habara akəŋwacii

* **1:1** 1.1 Timooti: 1 Koor. 4.17. **1:3** 1.3 Rooma 1.8-10; 1 Koor. 1.4; 1 Tees. 1.2-3. **1:6** 1.6 1.10; 2.13.

gəŋwanə, nya ɓaarii goonɗaanəkii. ⁸ Kə shii Əntanɗə oo'i, tantanyinə kə uu'i nyi tuunə patə dərəva, makə sətə uu'i Yeesu Aləmasiihu taamə.

⁹ Ma kədiinaaki acii Əntanɗə, wa uudənə goonə a gərə aakəŋwə aakəŋwa, una shii goonɗaanə, una taarapaagi də sətə dibə agi taa mi patə.

¹⁰ Madə kə dɪi ha'ə, ka mbeenə nuunə ka tagi sətə palee də ŋga'əənə, koonə mbee ka ndzaanə makətsəkii, yadə idəpaa uushi ashuunə uuseratə nə Aləmasiihu a ənya, † ¹¹ una slənə də rəgwakii agi patənə ŋga ndzaanə goonə. Yeesu Aləmasiihu ca vii baawəda ŋga da tsarə slənətsa kaa ənjə a hanətə da duunətənə də Əntanɗə.

**Aləmasiihu nə əpinaaki*

¹² Ndzəkəŋushi'ina, ŋga'ə ka nyi una shii oo'i, ma sənə kullii anəki, kə cakə tə dzənə ŋga waaza Njunyi Habara aakəŋwa. ¹³ Acii ha'ə, ma

soojiinə ətə ca nəhə yi ŋwanjuunə da patənə ŋga hara ənji ganə, kə shii tii oo'i, ma dɪi nyi magwaləkii a furəshina, putə ŋga nə'unə tə Aləmasiihu. ¹⁴ Ha'ə maa, ma ndzaanaaki a furəshina, kə cakə da ŋgeerənə ka lanənə ŋga ənji nə'unə agi vii goonɗatii, təya tsakə dzənə aakəŋwa də waaza Njunyi Habara yadə

ŋgwalənə.

¹⁵ Tantanyinə, tə'i hara ənji agitii ca waaza də sərəhənə ka nyi da ka madɛe də mabizhinə. Amma tə'i hara ənji ca waaza də ədzəmə

1:7 1.7 2 Koor. 7.3; Af. 3.1. **1:8** 1.8 1 Koor. 16.24; 2 Koor. 5.14.
1:9 1.9 Kwal. 1.9-10. † **1:10** 1.10 Rooma 12.2; Af. 5.27; Iɓər. 5.14; uuseratə nə Aləmasiihu a ənya: 1 Koor. 1.8; 2 Koor. 5.10; Fil. 1.6; 2.16. **1:11** 1.11 Yooh. 15.8; Yak. 3.17. **1:12** 1.12 Af. 3.1; 2 Tim. 2.9.

rəŋwə, kaa təya mbu'utəgi də Njunyi Habara ŋga Aləmasiihu taa ka wu patə. ¹⁶ Ma ci təya ɗa ha'ə, agi uudəŋə. Acii kə shii tii oo'i, kə kavə ɔntaŋfə aaciiki tə slənə ŋga ɓaarii goŋgaanə ŋga Njunyi Habara. ¹⁷ Ma ənjitsə ca waaza də sərəhənə ka nyi əsə, əntaa də ədzəmə rəŋwə ci təya waaza Njunyi Habara ŋga Aləmasiihu, amma putə ŋga uudə natii na. Ma nə tii ka hiimanə, ka tsakəvənə nə tii ka nyi cibəənə cii kya cibə a furəshina.

¹⁸ Pooshi haala! Acii taa də bwaya hiima, taa də njunyi hiima ci ənjə a waaza patə, agi fanə nə ənji wabənə agyanə Aləmasiihu. Acii ha'ə, ka moodasəkə nə nyi, ka tsakənə nə nyi ɗa moodasəkə əsə, ¹⁹ acii kə shii nyi, ma muudinəkii patə, ka kapaanə nə ənji tə nyi putə ŋga də'wa goonə da putə ŋga tsakənə ŋga Ma'yanə ŋga Yeesu Aləmasiihu. ²⁰ Agi kanə nə nyi nəki də patənə ŋga ədzəməki, paa nyi ka ɗa sətə ca ɗavə ka nyi ayinə. Amma taa guci patə, ma palee maa, agi saa'ina, ka waazanə nə nyi yadə ŋgwalənə, ənjə a shii ɗuunuunə ŋga Aləmasiihu. Ma shiinə ənji ɗuunuunə ŋga Aləmasiihu, dagi ndzaanaaki patə, taa nyi ma'ə da i əpinə, taa dagi əntənaaki. ²¹ Ma nya, Aləmasiihu nə əpinaaki. Sakwa nyi kə əŋki ɗii, kə ndzaa ci ka nyi ka riiba. ²² Amma, maa kə ndzaa nyi da i əpinə a maki, ka ɗfanə nə nyi slənə ətə palee də nfanə. Acii ha'ə, mashiimə nyi tafa ŋgutə taginəki ahada əntənə da ndzaanə

da i əpinə a maki. ²³ Kə təkəgi hiimaaki bəra'i: n̄ga'ə ka nyi nə dzənə ka ndzaanə da Aləmasiihu ka hakii. Acii dzənə ka ndzaanə da ci palee də kaḏeesəkənə ka nyi ka shaŋə. ²⁴ Amma gəḏə ndzaanaaki da i əpinə a maki ka putə goonə. ²⁵ Kə shii nyi ha'ə makə ətsa. Ha'ə əsə, kə shii nyi, ka ndzaanə nə nyi da i əpinə a maki, nya ndzaanə ahadoonə patə, kaa nya tsakə koonə n̄geerənə n̄ga dzənə aakəŋwa, una ndzaa da moodasəkə aɡi vii goon̄ga goonə. ²⁶ Maḏa kə ḏii ha'ə, ka upaanə nuunə rəgwa n̄ga haŋətənə tə Aləmasiihu putaaki ka shaŋə saa'itə nii kya ənə aahadoonə.

²⁷ Ma maḏuunə uushi palee, nə'utəmə makə sətə bii N̄unyi Habara n̄ga Aləmasiihu. Maa ḏii unə ha'ə, maḏa kə shi nyi aahadoonə, taa mashimə nyi əsə, ka fanə nə nyi makə sətə kəŋaanuunə ndihə ndihə də ədzəmə rəŋwə da hiima rəŋwə, una ḏa gazhi'waanə aɡi N̄unyi Habara kaa ənjə a vii goon̄ga. ²⁸ Goona n̄gwələ acii ənji daawaanə goonə taa gi'u. Ci na baarii ka tii oo'i, ka zamaginə nə Əntaŋfə də tii, amma ca luupaa tuunə. Ma ətsə patə, daci ɔntaŋfə ca shigi. ²⁹ Acii ma una, əntaa wata vii goon̄ga ka Aləmasiihu tanə vii Əntaŋfə koonə rəgwakii, amma koonə sa cibə ka putaakii. ³⁰ Yoo, wanaamə kə ləbəgərə aɡi sa ciba, ama cin̄jə aɡikii. Ma cibəətsa, mbərə mbərə da ətə shuuna nee ka nyi aɡikii. Ndilə ndilə əsə ci nə ənə ḏii nyi aɡikii əndzə'i, makə sətə fii unə.

1:23 1.23 2 Koor. 5.8-9. **1:27** 1.27 Kwal. 1.10; 1 Tees. 2.12.

1:30 1.30 Slənə 16.19-40; Fil. 1.13.

2

*Nə'u dərəpə ŋga Yeesu *Aləmasiihu*

¹ Kə shii unə, ləbə nuunə da Aləmasiihu; weewee tə'i unə da ŋgeerənə a ədzəmuunə putakii. Weewee agi baneenə nə uufənaakii ka ədzəmuunə. Ləbə nuunə da Malaaba Ma'yanə əsə, agi danə nuunə ŋga'aanə, una nəhəshi təgunuunə. ² Acii ha'ə, agi kədiinə nə nyi acii unə, koonə ndzaanə ka ma rəŋwə, una uufəshi, hiima goonə da aniya goonə a ndzaanə rəŋwə əsə. Maa kə dīi unə ha'ə, ka tsakənə nuunə uufəgi səkəki ka shaŋə. ³ Taa mi cuuna slənə patə, goona dā putə ŋga uufə noonə nə taa haŋətə noonə na. Amma baneemə ka noonə na, una ŋgərə ənji patə makə kə palee tii koonə. ⁴ Taa wu patə, wa ca dā sətə ca nafa taa tə wu patə. Ga ca ndzaa ka dā see sətə ca nafa tə naakii na. ⁵ Nə'umə dərəpə ŋga Yeesu Aləmasiihu agi ndzaashinə goonə.

⁶ Ma ca, taa ŋgahi uushi rəŋwə nə tii da əntaŋfə,

patə da ha'ə maŋgərəmə ci baawədaakii
kaa təya ndzaa mbərə mbərə da ci.

⁷ Amma kə bwasee ci ka ətsə ha'ə,
ca ndzaa mbərə mbərə da mava,
əndə shiŋkinə shigi ci,
ndilə ndilə əndə shiŋkinə nji ci ahada ənja.

2:2 2.2 Yooh. 13.34; 1 Koor. 1.10-11; Gal. 6.10; Af. 5.2; 1 Yooh. 4.12. **2:3** 2.3 Rooma 12.10; Gal. 5.26. **2:4** 2.4 1 Koor. 10.24. **2:5** 2.5 Yooh. 13.15; Rooma 13.14; 15.5. **2:6** 2.6 Yooh. 1.1-2; 17.5; Ibər. 1.3. **2:7** 2.7 Yooh. 1.14; Rooma 8.3; 2 Koor. 8.9; Ibər. 2.14,17.

⁸ Kə fii ci tə Əntanƒə, ca banee ka nəkii. Ha'ə kə ɛŋki ci.

Əntənəkii maa, gwa'avənə tə ci aashi ɛnfwa.

⁹ Putakii ha'ə, kə kapaa Əntanƒə tə ci dzakə agyanə uushi'inə patə,

ca vii ka ci məghərəvənə palee ka taa ŋgutə tsarə ŋga məghərəvənə.

¹⁰ Də ha'ə, taa mi patə dadagyə,

da anə hanyinə,

da ka hatə ɗii maməətə ɛnja,

ka gərə'waanə nə tii,

təya ɗuunətə tə ci,

¹¹ təya ba furəŋə ɛsə oo'i,

Slandanə nə Yeesu Aləmasiihu,

ka ɗuunətənə də Əntanƒə Dəsənaamə.

Ndzaanə ŋga ɛnji nə'unə makə bərənə ka duuniya

¹² Kadashinyinaakya, ma saa'itə nyi ahadoonə, kə njuunə a fa wabənaaki. Ma ɛndzə'i, pooshi nyi ahadoonə. Amma dəmə aakəŋwa də tsakə fanə. Dəmə aakəŋwa də sləna, una ŋgwalə acii Əntanƒə də ɛdzəmə rəŋwə, koonə upaa taa mi patə agi luupaanə goonə. ¹³ Dəmə aakəŋwa

də ɗanə ha'ə, makə ɗii ci, Əntanƒə ci saakii ca slənə a ɛdzəmuunə, kaa ca kavə tuunə ka moo slənə uushi'inə ɛtə kafeesəkə ka ci, ca vii koonə ŋgeerənə ŋga slənəginə də uushi'inəkii ɛsə.

2:8 2.8 Yooh. 10.17; Ibər. 5.8; 12.2. **2:9** 2.9 Slənə 2.33; Af. 1.21; Ibər. 1.4. **2:10** 2.10-11 Isaa. 45.23; Yooh. 5.23; Rooma 10.9; Səniinə 5.13. **2:13** 2.13 1.6; Yooh. 15.5; Rooma 7.18; 15.18; 1 Koor. 12.6; 15.10; 2 Koor. 3.5.

14 Taa mi patə cuuna ɗa, goona ɗa də ɲgunɲunənə taa də mabizhinə, 15 koonə shii ndzaanə yadə idəpaa uushi ashuunə, una ndzaa makətsəkii, una ndzaa ka ɲunyi manjeevənə ɲga Əntaɲfə yadə 'waslyakəənə ashitii. Ahada ənji *duuniya nuunə; bwaya ənja, maɲgərəkiki ənji nə tii. Ahadatii nuunə ka bərənə makə tikisanyinə agintaɲfə, 16 una kəsəpaa təɲə təɲə tə wabəətə ca vii əpinə. Madə kə dii unə ha'ə, ka upaanə nə nyi rəgwa ɲga ɗa moodasəkə ka shaɲə uusəratə nə Aləmasiihu a ənya, acii mandzaamə gazhi'waanaaki da slənaaki ka uushi zabə ahadoonə.

17 Ma vii goonɲa goonə, ka ndzaanə nə ci makə sataka ətə cuuna ɗa ka Əntaɲfə. Mbu'u idənaaki nə ənjə a ɲgərə, ənjə a tsakəvə aagi satakakii. Madə kə dii ha'ə, ka tsakənə nə nyi tuunə patə agi ɗa moodasəka. 18 Ha'ə nuunə əsə, kə dəbee una tsakə tə nyi agi ɗa moodasəka.

Wabənə agyanə i Timooti da Apafəroodita

19 Yoo, madə kə luuvə Slandanə Yeesu, agi kanə nə nyi nəki ɲga sləkeenə koonə ka Timooti kədəhə, kaa ca kira ka nyi habara goonə, nya ndzaa ka mabanee ma'yanə. 20 Pooshi əndə ganə makə ci, acii see ci daanəkii aashiki ca buurə tuunə ka shaɲə. 21 Hara ənji patə, see slənə uushi'iitə ca kadfeesəkə ka tii kavə tii nətii aagikii, makavəmə tii nətii ka slənənə ka

2:15 2.15-16 1.10; Dzək. 32.5; Dan. 12.3; Mat. 5.14; 10.16; 1 Koor. 1.31; 2 Koor. 1.14; Gal. 2.1-2; Af. 5.8; 1 Tees. 2.19. **2:17**

2.17 Rooma 15.16; 2 Tim. 4.6; 1 Yooh. 3.16. **2:18** 2.18 3.1; 4.4.

2:19 2.19 1.1. **2:20** 2.20 Slənə 16.2.

Yeesu Aləmasiihu. ²² Ma Timooti, kə shii unə də noonə nə tə ŋunyi ndzaanaakii, kə waazii inə Ŋunyi Habara da ci, kə slənyi ci da nyi agi slənəkii makə sətə ci uuzənə a slənə tii da dii. ²³ Acii ha'ə, madfa kə fii nyi sətə na uudəpaa anəki, tə ci cii kya ka nə ŋga sləkeenə ka ci aahoonə pii. ²⁴ Amma kə gi'i nyi tə Slandana, kə shii nyi ndilə ndilə oo'i, nyi ka nəki maa, ka ənənə nə nyi aa hoonə kədəhə.

²⁵ Ma ndzəkəŋushi'inaamə Apafəroodita, kə slənyi ci da nyi, ina cinə də gazhi'waanə ka putə ŋga Ŋunyi Habara. Kə ndzaa ci ka əndə sləkeenə goonə agi tsakənə tə nyi ka saa'itə mwayi nyi tsakənə tə nyi. Kə nee nyi kə dəbēe nya sləkee ka ci aahoonə. ²⁶ Acii ŋga'ə ka ci ka shaŋə kaa ca nee koonə patə. Makə fii ci, kə mbu'i gwakənaakii aa limuunə, kə ma'i haŋkalaakii ka shaŋə. ²⁷ Weewee kə gwaki ci tanyi, fidyasə mbədaanə kaa ca əntə. Amma kə nyihə əntaŋfə təgunuunaakii. Əntaa wata naakii, amma da i naaki nyihə əntaŋfə təgunuunə, acii gadə mabətəsəkə a gadəgi tə nyi. ²⁸ Acii putakii, kə mwayi nyi ka shaŋə tə sləkeenə ka ci, koonə ənə ka neenə ka ci, una da moodasəka, mabətəsəkaaki əsə a galee. ²⁹ Acii ha'ə, luumə tə ci də moodasəkə ka shaŋə putə ŋga Slandana, una gadēe ka tsarə ŋga ənjitsa. ³⁰ Acii fidyasə mbədaanə kaa ca əntə putə ŋga slənənə ka Aləmasiihu. Maneemə ci ka əpinaakii makə uushi. Ma dii ci ha'ə, kaa ca shii uudəpaa də tsakənə goonə tə nyi ka

madəbamoone.

3

Ndzaanə ka əndə goonğa akəŋwacii Əntanƒə

¹ Ndzəkəŋuushi'inəkya, wiinə səndə ciina uudəpaagi koonə: ma d'anuuna, d'amə moodasəkə agi ləbənə goonə da Slandana. Pooshi dzawə ka nyi nə ənənə ka dzəkwatə naahə koonə uushi'iitsa. Maa kə d'ii nyi ha'ə, ka ndzaanə nə haŋkala goonə ka hakii.

² Nəhəmə noonə nə acii məŋgərəkikinyinə, ədiitsa, ənjitsə kəŋaanə wata agyanə dzəgunənə ŋga *ryaminyanə, waatoo, laala kuvə'unə ŋga shishinə. ³ Amə nəndə da tantanyiitə ryaminyanə. Acii makavəmaamə naamə ka tsarə ŋga ryaminaatsatii. Amma paslənə gaamə tə Əntanƒə dagi tsakənə ŋga Malaaba Ma'yanə, da da moodasəkə agi ləbənə gaamə da Yeesu Aləmasiihu, ci nə ryaminyanə ŋga goonğa.

⁴ Maci ma slənətənə tə sətə ci ginə a nee, ka luupaanə nə ci ənda, ma nyi, tə'i nyi da uushi'iitsə kəŋaanə tii agyanəkii, palee ka taa wu patə. ⁵ Kə ryaminii ənji tə nyi ka tighəsənə ŋga uusəra ŋga poonə tə nyi. Əndə *Isərayiila nə nyi, agi slikərənə ŋga Beejaminə, hurənə ŋga əndə Ibəraaniya. Madfa nə'utə bariya ŋga *Yahudiinə əsə, əndə Farisa nji nyi. ⁶ Ma ŋga ŋukə, kə d'ii nyi gazhi'waanə ŋga nə'utə bariyatii, ha'ə kə dzəgərə nyi ka cibeənə ka

3:1 3.1 2.18. **3:2** 3.2 2 Koor. 11.13. **3:3** 3.3 Rooma 2.28-29.

3:4 3.4 2 Koor. 11.18,21. **3:5** 3.5 Luka 1.59; Rooma 11.1.

Ikəliisiyanyinə. Ma ka saa'ikii, kə nə'utə nyi bariya nga'ə, ma'idəpaamə ənji uushi ashiki.

⁷ Amma patənə nga uushi'iitsə nji kya nee makə ka upaanə nə nyi bwatyakii, ma əndzə'i, mazabə uushi nə tii akəŋwaciiki putə nga Yeesu Aləmasiihu. ⁸ Əntaa wata uushi'iitsə ndzaanə ka uushi zabə akəŋwaciiki, amma patənə nga uushi'inə, putə nga shiinə tə Yeesu Aləmasiihu Slandanəki. Ma shiinə tə ci, ci palee ka patənə nga uushi'inə. Ka putaakii bwasee nyi ka patənə nga uushi'inə, makə giwuuginə nə nyi ka neenə patə kaa nya shii upaa də Aləmasiihu a ədzəməki, ⁹ nya ndzaa maləbəkii da ci. Kə ŋgire əntanfə tə nyi ka əndə gooŋga, acii kə vii nyi gooŋga ka Aləmasiihu. Ma ŋgire ci tə nyi ka əndə gooŋga, əntaa putə nga slənaaki makə sətə bii bariya. Ma gooŋgaanaaki, daci əntanfə shigi putə nga vii gooŋgaaki ka ci. ¹⁰ Pooshi sətə mwayi nyi, madaame shiinə tə Aləmasiihu, nya shii baawədaakii ətə ma'igi ci agi maməətə ənja. Kə mwayi nyi nya ləbə da ci, nya sa cibə makə sətə sii ci naakii, nya luuvə əntənə makə sətə luuvə ci əntənə, * ¹¹ kaa nya shii madənə agi maməətə ənja, taa də iitə patə.

Da gazhi'waanə nga mbu'unə ka sətə aakəŋwa

¹² Paa nyi bii kə uugi nyi upaa shikwa taa pooshi sə nga idəpaanə ashiki ma'ə. Amma, agi dənə nə nyi gazhi'waanə nga upaa shikwa,

3:6 3.6 Slənə 8.3; 22.4; 26.9-11. **3:7** 3.7 Mat. 13.44,46. **3:9** 3.9 Rooma 1.17. * **3:10** 3.10-11 Rooma 6.8-11; 2 Koor. 4.10-11; madənə agi maməətə ənja: Slənə 4.2; Rooma 5.17.

makə ka ci 'wii Yeesu Aləmasiihu tə nyi kaa nya ndzaanə ka naakii. ¹³ Ndzəkəŋushi'inəkya,

ma nya, paa nyi kii nəki oo'i, kə uugi nyi upaa shikwakii. Amma uushi rəŋwə cii kya da: agi bwaseenə nə nyi ka sətə nja da a ba'a patə, nya da gazhi'waanə ŋga mbu'unə ka sətə aakəŋwa.

¹⁴ Agi ciŋənə nə nyi əntsahənə aakəŋwa kaa nya mbu'u ka muudinə ka upaa də shikwa, waatoo, əpinə ŋga ha dagyə. Acii ka upaa də əpinəkii 'wii Əntəŋfə tə nyi dəcii Yeesu Aləmasiihu.

¹⁵ Ma amə ənə uugi vii gooŋga gaamə zəŋanə, kə dəbee ama ndzaanə də tsarə ŋga hiimatsa. Madfa tə'i hara ənji agyuunə dii hiimatii pamə, ka baariinə nə Əntəŋfə ka tii, təya shii. ¹⁶ Ma d'anaamə tanə, dzaamə aakəŋwa də nə'u rəgwanə mbu'yaamə ka ənshinə agikii.

¹⁷ Ndzəkəŋushi'ina, unə patə, nə'umə dərəpaaki. Dzəgunəmə tə ənjitə ca slənə makə sətə cuuna nee ina slənə əsə. ¹⁸ Acii tə'i hara ənji laŋə ndzaa ka ənji daawaanə ŋga sətə ci əntənə ŋga Aləmasiihu ashii ənfwə a moo baariinə. Kə wabi nyi koonə agyanə ətsə bəzəkii, amma wanyinə ka ənənə ka dzəkwatənə koonə, ha'ə maa, da kiinə agiki.

¹⁹ Ma ənjitsa, zamaginə nə ənjə a zamagi də tii. Acii uushi'iitə kadeesəkə ka shishinətii nə əntəŋfənyinatii. Ma sətə ca kira ka tii ayinə, tə ci neenə tii da məghərəvənə. See buurə uushi'inə ŋga duuniya tanə nəndə a ədzəmətii. ²⁰ Ma

3:12 3.12 1 Tim. 6.12; 2 Tim. 4.7; Ibər. 12.1. **3:14** 3.14 1 Koor. 9.24-25. **3:16** 3.16 Gal. 6.15-16. **3:17** 3.17 1 Koor. 4.16; 1 Piita 5.3. **3:18** 3.18 1 Koor. 1.23; Gal. 6.12. **3:19** 3.19 Rooma 16.18.

amə, ənji ɲga dagyə naamə, waatoo ənji ɲga ɲwanjuunə ɲga Əntaɲfə. Jigaginə ɲga Maluu gaamə dadagyə ciina gəra, waatoo, Slandanə Yeesu Aləmasiihu. ²¹ Ma ca, ka zhi'weenə nə ci ka matəgugunə shishiinə gaamə, ca ndzaa da məghərəvənə makə naakii. Ka danə nə ci ha'ə də maduunə baawədaakii. Də baawədakii cii kəya da ɲwanjuunə taa agyanə mi patə.

4

Damə moodasəkə ɲga ləbənə da Slandana

¹ Ndzəkəɲushi'inəkya, kə uu'i nyi tuunə, ɲga'ə ka nyi nə ənənə ka neenə koonə ka shaɲə. Sə ɲga moodasəkaaki nuunə, sə ɲga dəlaginaaki nuunə əsə. Yoo, kadashinyinaaki, makə kə shii unə oo'i, ka ənyanə nə Aləmasiihu, kəɲaanəmə ndihə ndihə agi ləbənə goonə da Slandana.

² Agi kədiinə nə nyi acii Afoodya da Sintiki, tuutəta'ə, ga mabizhinə a ndzaanə ahadatii ma'ə, wa təya ndzaanə ka ma rəɲwə, makə d̄ii ci ləbə nə tii da Slandana. ³ Ma hə əsə d̄ii, ɲunyi guva-slənaakya, agi kədiinə nə nyi aciiku kaa ha tsakə tə makiitsa, acii kə d̄ii inə gazhi'waanə da tii agi waaza ɲunyi Habara. Kə slənyi tii da Kalimasə da patənə ɲga hara guvii-slənaaki. Manaahəkii nə ləmə ɲga əɲjitsə asəkə ləkələkətə ɲga Əntaɲfə, waatoo, ləkələkətətə na baarii tə əɲjitə upaa əpinə ɲga ca'ə ndəɲwə ndəɲwə.

3:20 3.20 Af. 2.6; Ibər. 13.14. **3:21** 3.21 Rooma 8.29; 1 Koor. 15.25,28,43-53; Kwal. 3.4. **4:1** 4.1 1 Tees. 2.19-20. **4:3** 4.3 Slənə 3.5.

⁴ Yoo, taa guci patə, dʌmə moodʌsəkə agi ləbənə goonə da Slandana. A dzəkʌwətə nyi banə koonə əsə: dʌmə moodʌsəka. ⁵ Wa haala goonə a ndzaanə nyunyikii akəŋwacii taa wu patə. Kədəhə nə Slandanə ka shinə.

⁶ Goona buurə taa mi. Amma, taa agi mi patə, baariimə ka Əntanʃə sətə cuuna moo agi də'wa, una kədii aciikii də kuyiriinə tə ci. ⁷ Madʌ kə dʌi unə ha'ə, ka viinə nə Əntanʃə koonə ndzaanə jamə ətə palee ka shiinə ŋga əndə shiŋkinə patə. Jamənəkii na nəhə ədzəmuunə da hiima goonə, una ndzaa ka mabanee ma'yanə agi ləbənə goonə da Yeesu Aləmasiihu.

⁸ Ndzəkəŋushi'ina, wiinə səndə ciina uudəpaagi koonə: ma dʌnuuna, kavəmə nyunyi uushi'inə ŋga goonʄa aagi hiima goonə, ətə bahə dʌunətənə, uushi'iitə ndzaa də rəgwakii, ətə malaabakii. Kavəmə əsə aagi hiima goonə tə sətə ca kadeesəkə ka ənja, ətə ŋga dəlaginə. Taa ŋgutə uushi, madʌ kə nee unə nyunyikii, bahə dəlaginə, kavəmə aagi hiima goonə.

⁹ Slənətəmə sətə jigunyii koonə, una slənətə sətə luuvuunə da sətə fii unə a maki da sətə nee unə agi ndzaanaaki. Madʌ kə dʌi unə ha'ə, ma Əntanʃə Əndə vii ndzaanə jamə, ka ndzaanə nə ci doonə.

Kuyiriinə ŋga Bulusə tə ənji Filipi

¹⁰ Ma agi ndzaanaaki ləbə da Slandana, kə dʌi nyi moodʌsəkə ka shaŋə. Acii agi magərə

4:4 4.4 2.18. **4:5** 4.5 1.10; Rooma 13.11-12; 1 Koor. 16.22; Ibər. 10.25; Yak. 5.8; 1 Tees. 5.1-2. **4:6** 4.6 Jab. 37.5; Mat. 6.25; 1 Piita 5.7. **4:7** 4.7 Yooh. 14.27; Kwal. 3.15. **4:8** 4.8 Rooma 12.17-18. **4:9** 4.9 3.17; 1 Koor. 13.11.

saa'i, kə ɔnyuunə ka buurətənə tə nyi. Paa nyi bii oo'i, kə bwasee unə ka buurətənə tə nyi, amma rəgwa nəndə ma'upaamuunə nga ɗanə ha'ə. ¹¹ Əntaa putə nga ətəenaaki ka uushi bii nyi ha'ə, makə kə jigunyii ndzaanə də mabanee ma'yanə də sətə upaa nyi. ¹² Kə shii nyi makə sətə ndzaanəki agi ghanə, kə shii nyi ɔsə makə sətə ndzaanəki maɗa tə'i uushi'inə aciiki lanə. Madzəgunəkii nə nyi anəkii taa da patə, taa ka ŋgutə saa'i ɔsə. Ka mabanee ma'yanə nə nyi, taa nyi maburəkii, taa nyi də madəfənə, taa tə'i uushi'inə lanə aciiki, taa nyi agi ghanə. ¹³ Tə'i nyi da ŋgeerənə nga sə'watə taa mi patə putə nga Aləmasiihu. Ci ca vii ka nyi ŋgeerənəkii.

¹⁴ Patə da ha'ə, makə cakuunə tə nyi agi cibaaki, kə ɗii unə ŋga'ə. ¹⁵ Unə ɔnji Filipi, unə də noonə nə, kə shii unə, ma saa'itə 'watəgi ɔnji waaza Njuni Habara, saa'itə madəgi nyi anə hanyinə nga Makiduuniya, taa rəŋwə, pooshi ɛndə'i Ikəliisiya ləbə ciinə da nyi agi viishinə maɗaamə unə. ¹⁶ Taa saa'itə nyi də Teesaloonika maa, ɔntaa wata rəŋwə sləkee unə ka nyi ka sə ŋga tsakənə də nyi. ¹⁷ Amma ɔntaa viinə goonə cii kya moo. Aa'a, bwatya cii kya alə koonə ka tsakəvənə aagyanə ŋunyi slənə goonə.

¹⁸ Kə liwə nyi patənə nga sətə dəbee; ha'ə maa, kə paləgi. Makə kə kira Apafəroodita ka nyi patənə nga uushi'iinə sləkee unə ka nyi, pooshi uushi cii kya moo ma'ə. Ma uushi'iinə sləkee unə ka nyi, ŋunyi uushi akəŋwacii Əntanɗə, makə

4:11 4.11 1 Tim. 6.6-8; Ibər. 13.5. **4:13** 4.13 2 Koor. 12.9-10.

4:15 4.15 2 Koor. 11.8-9. **4:16** 4.16 Slənə 17.1. **4:17** 4.17

1 Koor. 9.11.

sataka ətə cii kəya luu, ca kadeesəkə ka ci.

¹⁹ Ma Əntaŋfwaaki, pooshi uushi ətə cii kəya ətəe agi dʉunuunaakii, ka viinə nə ci koonə patənə ŋga sətə dəbee una upaa daciji Yeesu Aləmasiihu. ²⁰ Wa ənjə a dʉunətə tə Əntaŋfə Dəsənaamə ka ca'ə ndəŋwə ndəŋwə. *Aamiina.

Tsakə nəhəpaanə

²¹ Yoo, nəhəpaamə tə ənji ŋga Əntaŋfə patə də rəŋwə rəŋwə agi ləmə ŋga Yeesu Aləmasiihu. Ma ənji nə'unə ənə dʉi inə ganə ka hakii, kə nəhəpaa tii tuunə patə. ²² Kə nəhəpaa patənə ŋga ənji ŋga Əntaŋfə tuunə, ma palee maa, ənjinə ca slənə asəkə yi ŋwanjuunə.

²³ Wa Slandanə Yeesu Aləmasiihu a dʉa koonə pwapoonə a ədzəmuunə. [*Aamiina].

Kura Aləkawalə ɲga Əntaɲfə
Gude: Kura Aləkawalə ɲga Əntaɲfə New Testament
copyright © 2000 Wycliffe Bible Translators, Inc.

Language: Gude

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

56396c70-45d3-5118-be46-8c4c3fec34f1